



## **KENYATAAN MEDIA**

### **UNTUK SIARAN SEGERA**

### **PTPTN PRIHATIN BANTU KELUARGA ASNAF YANG TERJEJAS AKIBAT COVID-19**

1. Perbadanan Tabung Pendidikan Tinggi Nasional (PTPTN) sentiasa prihatin dan proaktif melaksanakan program tanggungjawab sosial korporat (CSR) dalam usaha meningkatkan kesejahteraan masyarakat dan membantu golongan yang memerlukan.
2. Seperti sedia maklum, negara kini berdepan dengan persekitaran yang cukup mencabar ekoran penularan pandemik Covid-19 yang masih belum reda. Pelaksanaan Perintah Kawalan Pergerakan (PKP) sedikit sebanyak telah menjejaskan pendapatan masyarakat, terutama golongan yang kurang berkemampuan. Menyedari hakikat itu, **PTPTN tampil untuk memberi sumbangan sebanyak RM1,000,000 bagi membantu 5,000 keluarga asnaf di Kuala Lumpur.** Sumbangan ini merupakan zakat perniagaan PTPTN.
3. Daripada sumbangan ini, sebanyak RM500,000 akan disalurkan melalui Pertubuhan Kebajikan Dana Kita (DANA KITA) untuk menguruskan sumbangan dalam bentuk barangan keperluan harian, manakala baki RM500,000 lagi akan diberikan dalam bentuk akaun Skim Simpanan Pendidikan Nasional (SSPN-i) bagi memastikan masa depan pendidikan yang lebih terjamin dalam kalangan keluarga asnaf.
4. Majlis Penyerahan Sumbangan kepada DANA KITA telah berlangsung pada hari ini dan disiarkan secara *online* di *Facebook* rasmi PTPTN. *Mock Cheque* bernilai RM500,000 disampaikan oleh YBhg. En. Wan Saiful Wan Jan, Pengerusi PTPTN kepada pengasas DANA KITA, Cikgu Mohd Fadli bin Mohamed Salleh sebagai simbolik penyerahan sumbangan.
5. YBhg. En. Wan Saiful Wan Jan, Pengerusi PTPTN berkata, “PTPTN merasai keluh resah dan kesusahan rakyat yang terjejas pendapatan mereka akibat penularan wabak ini. Ada yang tidak dapat bekerja seperti biasa, malah ada juga yg diberhentikan kerja, apatah lagi bagi mereka yang kurang berkemampuan. Situasi ini pastinya memberi kesan kepada kehidupan seharian anak-anak. Sebagai agensi yang berperanan menjadi tabung pendidikan negara yang sentiasa dekat dengan masyarakat, PTPTN terpenggil untuk menyumbang agar dapat mengurangkan beban yang ditanggung mereka.”

6. En. Ahmad Dasuki bin Abdul Majid, Ketua Eksekutif PTPTN pula berkata, secara keseluruhannya, melalui sumbangan ini, setiap keluarga asnaf yang dikenalpasti akan menerima sumbangan berjumlah RM200.00, berupa barangan keperluan harian bernilai RM100.00 dan RM100.00 lagi diberikan dalam bentuk akaun SSPN-i kepada seorang anak yang berumur 18 tahun ke bawah dalam keluarga asnaf tersebut. Kami yakin DANA KITA sebagai pertubuhan kebajikan yang bergiat aktif dalam agihan sumbangan dan melaksanakan program-program amal akan dapat membantu PTPTN bagi merealisasikan hasrat murni ini.

7. Dalam pada itu, Cikgu Mohd Fadli bin Mohamed Salleh, pengasas DANA KITA, berkata “Kerjasama dengan agensi kerajaan dan korporat merupakan salah satu program *outreach* DANA KITA untuk tahun 2020. Ia sangat membantu DANA KITA bagi melaksanakan program-program di lapangan. Kami amat berbesar hati dengan kerjasama yang terjalin dan akan memberikan komitmen sepenuhnya bagi menjayakan program ini. Diharapkan dengan penglibatan DANA KITA sebagai pemudahcara dapat mengubah stigma masyarakat terhadap PTPTN yang hanya menguruskan pinjaman tetapi sebenarnya turut menyediakan skim simpanan pendidikan dan prihatin dalam membantu masyarakat.”

8. Bagi melancarkan pemberian sumbangan ini, Skuad PTPTN Prihatin akan turun padang bersama sukarelawan DANA KITA bagi membantu mengurus dan menyelaras agihan sumbangan ini. Agihan sumbangan ini dijangka bermula pada bulan Disember 2020 dan berakhir pada Mac 2021.

9. Sesungguhnya, PTPTN sentiasa prihatin dan menyokong usaha kerajaan dalam menangani wabak Covid-19 yang melanda negara ini. Semoga dengan sumbangan PTPTN ini dapat meringankan beban kesusahan yang ditanggung oleh masyarakat. Pada Jun 2020, ketika negara berdepan gelombang pertama pandemik ini, PTPTN telah turut tampil memberikan sumbangan kepada Kementerian Kesihatan Malaysia (KKM) membantu petugas barisan hadapan dengan menyumbangkan 1,000 peralatan perlindungan diri (PPE) dan 10 set *powered air purifying respirator* (PAPR) yang bernilai RM160,000.00. Selain itu, PTPTN turut menyumbang set berbuka puasa dan kuih raya untuk pasukan barisan hadapan yang menjaga sekatan jalan raya dengan peruntukan sebanyak RM77,000.